

Месяца маиа во 2-й день
Святых блаженных старицы Матроны Московския
На велицей вечерни
Блажен муж: 1-й антифон. На Господи, возвах: стихиры святых
на 6, глас 6.

Подобен: Все отложше:

Богоблаженная мати Матроно,/ ты, дневнаго света не познавши,/ светом Невечерним озарилася еси,/ и со ангельскими лики водворяющися,/ прославляеши Святую Троицу,/ Юже моли непрестанно,/ просветити ны, душевными очима ослепленныя. Боголюбивая старице Матроно,/ ты, от Господа дар прозрения приемши,/ сокровенная сердец человеческих ведала еси,/ и, будущая, яко настоящая прорицающи,/ заблуждшия ко Христу привела еси,/ Его же моли непрестанно, / спасти и просветити души наша.

Вся, яже в мире сем отринувши,/ и изгнана бывши правды ради,/ странница на земли явилася еси/ не имущи, где главу подклонити,/ Христу Спасителю нашему подобящися,/ блаженная мати Матроно,/ Царствия Небеснаго достигла еси,/ идеже несть болезнь, печаль, ни воздыхание,/ но со ангельскими лики водворение/ и жизнь безконечная.

Ины стихиры, глас 2.

Подобен: Егда от Древа:

Егда година лютая земли нашея приспе/ и жизнь верных власти безбожных предадеся,/ ты же, блаженная,/ по весем и градом скитающися/ правую веру/ небоязненно и дерзновенно в людех утверждала еси/ во еже кийждому, Бога взыскующему,/ ненаветну от сил вражиих быти/ и спасение улучшить.

Внегда умрети ми,/ к месту моего упокоения притецете/ и о потребнем вам рцйте,/ аз же, яко жива сущи,/ потщуся Господа умоляти/ вся полезная вам даровати./ Тако с любовию/ к тебе притекающим рекла еси,/ старице Матроно блаженная.

Егда ти приспе время юдоль плачевную оставить/ и от земных в Небесная вселитися,/ телу же твоему погребену быти,/ тогда реченная тобою сбывается./ Все бо роди православных/ к месту погребения твоего притекаху,/ и, потребная себе просяще,/ непостыдно сие улучаху,/ Матроно, богоблаженная мати.

Слава, глас 6:

Днесь торжествует обитель Покрова Пресвятыя Девы Богородицы,/ днесь радуется славнейший град Москва/ и вси людие Российстии ликоствуют,/ яко даровася нам многоценное сокровище,/ честныя и многоцелебныя мощи твоя,/ старице Матроно,/ подают бо всем приходящим благодатную помощь:/ болезней исцеление и зол избавление,/ грехов прощение и душевное исправление./ Темже благодарственно возвеличим Господа,/ прославляющаго святых Своих/ и дарующаго тобою нам велию милость.

И ныне, Богородичен: Кто Тебе не ублажит:

Вход. Прокимен дне. И чтения.

Бытия чтение (глава 18):

Приблизився Авраам, рече:/ Погубиши ли праведнаго с нечестивым/ и будет праведник яко нечестивый?/ Аще будут пятьдесят праведницы во граде, погубиши ли я?/ Не пощадиши ли всего места пятидесяти ради праведных, аще будут в нем?/ Никакоже Ты сотвориши по глаголу сему,/ еже убити праведника с нечестивым,/ и будет праведник яко нечестивый: никакоже,/ судяй всей земли, не сотвориши ли суда?/ Рече же Господь:/ Аще будут в Содомех пятьдесят праведницы во граде,/ оставлю весь град и все место их ради./ И отвещав Авраам, рече:/ ныне начах глаголати ко Господу моему,/ аз же есмь земля и пепел./ Аще же умалятся пятьдесят праведницы в четыредесять пять,/ погубиши ли четыредесяти пятих ради весь град?/ И рече: Не погублю, аще обрящу тамо четыредесять пять./ И приложи еще глаголати к Нему и рече:/ Аще же обрящутся тамо четыредесять?/ И рече: Не погублю ради четыредесяти./ И рече: Что, Господи, аще возглаголю?/ Аще же обрящется тамо тридесять?/ И рече: Не погублю тридесятих ради./ И рече: Понеже имам глаголати ко Господу:/ Аще же обрящутся тамо двадесять?/ И рече: Не погублю, аще обрящутся тамо двадесять./ И рече: Что, Господи, аще возглаголю еще единою?/ Аще же обрящутся тамо десять?/ И рече: Не погублю десятих ради./ Отиде же Господь, яко преста глаголя ко Аврааму,/ и Авраам возвратися на место свое.

Пророчества Иоилева (глава 2):

Рече Господь:/ уведите, яко посреде Израиля Аз есмь,/ и Аз Господь Бог ваш,/ и несть инаго разве Мене,/ и не посрамятся ктому людие Мои во век./ И будет по сих,/ и излию от Духа Моего на всяку плоть / и прорекут сынове ваши и дщери ваша,/ и старцы ваши сония узрят,/ и юноты ваши видения увидят./ Ибо на рабы Моя и на рабыни Моя во дни оны излию от Духа Моего,/ и дам чудеса на Небеси и на земли, кровь и огонь и курение дыма./ Солнце обратится во тьму и луна в кровь,/ прежде неже приити дню Господню великому и просвещенному./ И будет, всяк, иже призовет Имя Господне, спасется,/ яко в горе Сионе и во Иерусалиме будет спасаемый, якоже рече Господь,/ и благовестуемии, ихже Господь призва.

Премудрости Соломоновы чтение (глава 3):

Праведных души в руце Божией и не прикоснется их мука./ Непщевани быша во очесех безумных умрети,/ и вменися озлобление исход их,/ и еже от нас шествие – сокрушение,/ они же суть в мире./ Ибо пред лицом человеческим, аще и муку примут,/ упование их безсмертия исполнено,/ и, в мале наказани бывше,/ великими благодетельствовани будут,/ яко Бог искуси я и обрете их достойны себе./ Яко злато в горниле, искуси их/ и, яко всеплодие жертвенное, прият я./ И во время посещения их возсияют и, яко искры по стеблию, потекут./ Судят языком и обладают людьми,/ и воцарится Господь в них во веки./

Надеющиеся Нань разумеют истину/ и вернии в любви пребудут
Ему./ Яко благодать и милость в преподобных Его / и посещение
во избранных Его.

На литии стихиры, глас 7:

Времени лютому во отечестве нашем преспевшу,/ явишася мнози
мученицы и исповедницы Христовы,/ Матрона же старица
блаженная,/ яко мученица бескровная,/ изгнания, скитания,
уничуждения,/ глад велий и жесток хлад претерпе,/ и верность
Господеви/ даже до часа смертнаго сохрани./ Ныне, яко и прежде,
нас научает/ богоугодное и праведное житие на земли являти / и
присно со Христом быти.

Приходящим к тебе, блаженная старице Матроно,/ дерзновенно
возвещала еси:/ оскудение веры в людех/ многия беды несет,/
сега ради покаяние о гресех/ пред Господем подобает приносить/
и молитвы усердныя/ присно Тому творити,/ да не гневом Своим /
с лица земли истребит ны,/ но, да веру правую исповедующе,/
велелепно прославим на земли/ жизнь и щедроты нам
Даровавшаго.

Слава, глас тойже:

Аще не стоит селение без праведника,/ не устоит земля Русская,
оскудевши благочестием./ Сице наставляла еси, праведная
Матроно,/ люди заблуждшия,/ молящися усердно,/ да помилует
Господь землю Русскую.

И ныне Богородичен, глас тойже:

О, Пресвятая Владычице Дево Богородице!/ Образ Твой
Взыскание погибших именуемый/ тщанием Матроны праведныя
написася/ и к пользе верных во храм Успения Твоего принесесея,/
да вси, взирающе нань,/ надежду твердую имут на Тя./ Взыщи и
наша души, Богомати,/ во мраце греховнем блуждающия,/ Твоим
предстательством и молитвами Матроны блаженныя.

На стиховне стихиры, глас 5.

Подобен: Радуйся:

Радуйся, обитель Пречистыя Богородицы,/ имущи в себе
сокровище неистошимое/ честныя мощи блаженныя Матроны./
Сия бо, света дневнаго не познавши,/ духовное же зрение от Бога
приемши,/ даром прозрения и исцеления обогатися,/ научает ны,
грешныя,/ како подобает спастися/ и получитьи в день судный от
Господа/ прощение грехов и велию милость.

Стих: Господь решит окованныя,/ Господь умудряет слепцы.

Радуйся, избранный сосуде Святаго Духа,/ Небесная жительнице,/
немощным человеком помощнице,/ и ко спасению
путеводительнице,/ блаженная старице Матроно./ Ты бо,
прозирающи грядущая, яко настоящая,/ многия люди от
греховнаго пути обратила еси/ и ко Христу привела еси./ Испроси
от Господа и нам, согрешающим,/ грехов оставление и велию
милость.

Стих: Возведох очи мои в горы,/ отнюдуже приидет помощь моя.

Радуйся, на враги непобедимая воительнице,/ козни их всегда

разрушающая/ и на жизненном пути нас укрепляющая,/ кроткая
обличительнице пороков наших./ Предстоящи ныне престолу
Царя небесных воинств,/ испроси нам, предобрая мати,/ память
твою верно почитающим,/ прощение грехов и велию милость.
Слава, глас 6:

Приидите, прославим песенными хвалы и чистым сердцем,/
блаженную мать нашу Матрону,/ яже во дни безбожия и
гонения/ непоколебимый столп благочестия и веры бысть,/ в
немощем телеси сущи,/ силу Божия благодати показа,/ и многия
люди окрест ея к Богу приведе,/ к покаянию и молитве о земли
Российстей всех призва,/ и, тако сонм святых Московских
исполнивши,/ явися присная о нас пред Богом печальница/ и
теплая молитвенница.

И ныне, глас тойже:

Богородице, Ты еси Лоза истинная,/ возрастившая нам Плод
живота,/ Тебе молимся,/ молися, Владычице,/ со апостолы и
праведною Матроною/ помиловати души наша.

Тропарь, глас 2:

Богом умудренную блаженную старицу Матрону,/ земли Тульския
процветение/ и града Москвы преславное украшение,/ восхвалим
днесь, вернии./ Сия бо, света дневнаго не познавши,/ светом
Христовым просветися/ и даром прозрения и исцеления
обогатися./ Пресельница же и странница на земли бывши,/ ныне
в чертозах Небесных Престолу Божию предстоит/ и молится о
душах наших.

На утрени

На Бог Господь: тропарь святых, дважды. Слава, и ныне,
Богородичен.

По 1-м стихословии седален, глас 8:

Мощи твоя источают всем болящим исцеление,/ приходящим
верою и просящим посещения твоего, мати праведная и
досточудная Матроно./ Темже твоими молитвами испроси и нам
велию милость.

Слава, и ныне. Богородичен:

Радуйся, ангелом радость мира приемшая,/ радуйся, рождшая
Творца Твоего и Господа,/ радуйся, сподобльшаяся быти Мати
Божия.

По 2-м стихословии седален, глас 6:

Приидите, верных множества, днесь праведную старицу
благочестно восхвалим,/ истинную угодницу Христову, полки
бесов отгнавшую,/ ныне же со ангелы ликовствующую и Христу
непрестанно молящуюся/ и с любовью той возопиим:/ не забуди
нас, радости наша, мати блаженная Матроно,/ восхваляющих и
чтущих священную память твою.

Слава, и ныне, Богородичен:

Призри на нас, недугующих, Всенепорочная,/ и исцели болезни
наша душевныя вкупе же и телесныя,/ да возвеличим Тя,
возвеличившую все человечество.

Величание:

Величаем тя,/ святая праведная Матроно,/ и чтим святую память твою,/ ты бо молиши о нас/ Христа Бога нашего.

Псалом избранный:

Блаженни непорочнии в путь,/ ходящие в законе Господни.

Блаженни испытующии свидения Его,/ всем сердцем възыщут Его.

Благословен еси, Господи,/ научи мя оправданием Твоим.

Вразуми мя и испытаю закон Твой и сохраню/ и всем сердцем моим.

Глаголах о свидениях Твоих пред цари/ и не стыдяся.

Боящиеся Тебе узрят и возвеселятся,/ яко на словеса Твоя уповах.

Во век, Господи, слово Твое пребывает на Небеси.

Жива будет душа моя и восхвалит Тя/ и судьбы Твои помогут мне.

По полиелеи седален, глас 4:

Рука Господня крепче веде тя путем веры,/ сего ради сквозе терния и волчцы нечестия на земли нашей обильно прозябши,/ неврежденно возшла еси в Небесныя обители, мати Матроно блаженная.

Таже степенна, 1-й антифон 4-го гласа. Прокимен, глас 4: Господи, открий очи мои/ и уразумею чудеса от закона Твоего. Стих:

Отврати очи мои, еже не видети суеты,/ в пути Твоем живи мя.

Всякое дыхание: Евангелие от Матфея, зачало 104.

По 50-м псалме стихира, глас 6:

Святая славная старице Матроно,/ града Москвы похвало/ и Руси святых, молитвеннице,/ в многоразличных нуждах нам помози,/ коемуждо полезная дарующи,/ во спасение душ наших.

Канон святых, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.

Боже Всемилостиве, сподоби ны, недостойныя,/ воспети угодницу Твою Матрону,/ нашу изрядную пред Тобою ходатаицу и молитвенницу.

Любовию ко Христу от младенческих пелен уязвилася еси/ и Тому неленостно в житии Твоем служила еси, мати блаженная.

Избранный сосуд Духа Святаго явилася еси,/ благодать бо Божию от святых купели до конца дней твоих/ присно усердно возгревала еси, мати блаженная.

Богородичен: Архангельски песнь Тебе поем, Чистая:/ радуйся, Обрадованная, Марие, Мати Христа Бога,/ присно молящаяся за род наш.

Песнь 3

Ирмос: Небеснаго круга Верхотворче Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ едине Человеколюбче.

Житием богоугодным и праведным освятилася еси, мати блаженная,/ темже и нам, с верою к тебе прибегающим,/ помози благодати Божия исполниться.

Христа Человеколюбца, Егоже от юности твоя возлюбила еси,
мати святая,/ моли утвердиться нам на камени заповедей Его.
Церкве Зиждитель Господь/ светообразное чадо церковное,
содела тя, праведная мати,/ и в любви Своей утверди тя, яко
Човеколюбец.

Богородичен: Небеси и земли Царице, Богородице Дево,/ и
Церкве Покрове всемогущий,/ утверди обитель сию непоколебимо
во благочестии пребывати.

Седален, глас 4:

По имени твоему, Матроно блаженная, житие твое бысть,/
скитания, бо поношения и скорби ни во что же вменивши,/
госпожа явилася еси не токмо именем, но и духом./ Темже и вся
потребная Царствия ради Божия стяжала еси и Богом обогатилася
еси.

Слава, и ныне, Богородичен:

Ныне – радуйся – Тебе зовем, Владычице,/ грешником
погибающим исправление и нам, величающим Тя, спасение.

Песнь 4

Ирмос: Услышах, Господи,/ смотрения Твоего таинство,/ разумех
дела Твоя/ и прославих Твое Божество.

Смотрение Божие на тебе особь явлено бе, мати блаженная,/ яко
слепа и немощна телом сущи,/ даром прозрения и чудес
обогатилася еси/ и венцем нетленным от Господа украсилася еси.
Мудрования плотская презрела еси, блаженная,/ обаче
мудростию, еуже Господь умудряет слепцы,/ изрядно обогатилася
еси.

Яко алавастр мира, облагаухающь пределы Российстии,/ вемы тя,
Матроно праведная,/ стекаются бо к тебе со всех концов людие
земли наша, заступления просяще.

Богородичен: Блажим Тя, вси роди, Пресвятая Дево,/
погибающих взыскующую, немощных врачующую и сирых
заступающую.

Песнь 5

Ирмос: Просвети нас повелении Твоими, Господи,/ и мышцею
Твоею высокою/ Твой мир подаждь нам,/ Человеколюбче.

Христос, Свет Истинный,/ ум твой, святая мати, просветил есть к
разумению повелений Его,/ темже служити Ему в житии твоём
усердно потщалася еси.

Светом Христовым озаряема,/ в мире сем безбожном и
грехолюбивем/ явилася еси, яко столп огнен, светяй во тьме,
праведная Матроно.

Яко звезда многосветлая, возсияла еси в житии твоём, праведная
Матроно,/ указующи истинный путь людем заблудшим./ Сице и
ныне в Небесных обителях водворившись,/ моли просветити и
спасти души наша.

Богородичен: Свет рождающая Божественный и Превечный,
Богоневесто,/ разреши мглу прегрешений наших.

Песнь 6

Ирмос: Молитву пролию ко Господу,/ и Тому возведу печали
моя,/ яко зол душа моя исполнися,/ и живот мой аду
приблизися,/ и молюся, яко Иона:/ от тли, Боже, возведи мя.
Молитвы присныя к Богу возносящи,/ вся нужды и печали Тому
возвещала еси, праведная мати,/ и, яко Иона во чреве китове, в
скорби велией вопияла еси:/ Боже, из глубины зол возведи мя.
Помощию Божию вся нужды смиренне претерпевши, праведная
Матроно,/ вражью силу молитвою твоею победила еси./ Темже,
ныне неоскудно благодать Христову приемши,/ молися, еже от
злодейства диавольскаго нам избавитися.

Многими подвиги твоими, праведная Матроно, стала еси противу
козней диавольских,/ брань введущи с миродержителем тьмы века
сего./ Темже о нас ныне молися,/ да приемем вся оружия Божия/
и возможем противитися в дни лютыя духовом злобы
поднебесным.

Богородичен: Ада и смерти Победителя рождающая, Пречистая
Дево,/ моли Господа и Сына Твоего врагов злодействия нас
избавити.

Кондак, глас 7:

К служению Христову/ от чрева матерня предызбранная,/
праведная Матроно,/ стезею скорбей и печалей шествующи,/
твердую веру и благочестие явивши,/ Богу угодила еси./ Темже,
почитающе память твою, молим тя:/ помози и нам в любви Божии
пребывати,/ старице блаженная.

Песнь 7

Ирмос: От Иудеи дошедше отроцы/ в Вавилоне иногда верою
Троическою пламень пещный попраша, поюще:/ отцев Боже,
благословен еси.

Возгорется нечестие в земли нашей,/ яко пламень древле в печи
вавилонстей,/ веру отеческую в людех тщащееся поपालити,/ ты
же, блаженная, приходящих к тебе научала еси верою воспевати:/
отцев, Боже, благословен еси.

Боготропнии мучителие от закона Божия отступльшии,/ огонь
гонений во стране нашей возжгоша,/ ты же, праведная Матроно,
приходящим к тебе силою Христовою росу духовную подавала
еси,/ да не поपालены до конца будут, о присно воспевают:/ отцев,
Боже, благословен еси.

Ангелу Божию,/ в печи вавилонстей отроком древле пламень
огненный угасившему, уподобилася еси, блаженная,/ российским
бо людем во дни нечестия молитвами твоими от злобознаго
языковредия невреденным быти споспешествовала еси,
научающи взывати:/ отцев, Боже, благословен еси.

Богородичен: К покрову Твоему прибегаем, Дево, Купино
неопалимая,/ грехи наша, яко терние зловредное, попали
молитвами Твоими,/ да чистым сердцем взываем:/ отцев, Боже,
благословен еси.

Песнь 8

Ирмос: Царя Небеснаго,/ Егоже поют вси ангельстии,/ хвалите и

превозносите во вся веки.

Царя Небеснаго измлада возлюбила еси / и Тому до конца дний своих со тщанием служила еси, блаженная./ Ныне же с лики ангельскими присно поеши:/ Господа пойте и превозносите Его во вся веки.

Заповеди Господни усердне соблюдающи,/ столп благочестия России явилася еси, мати блаженная,/ яко же о тебе предрече кронштадтский праведник./ С ним же превозносиши Христа во веки.

Мнозии людие российстии, плененнии безбожием,/ молитвами твоими, праведная Матроно, на путь спасения возвратишася/ и, в вере правой укрепившеся, Триединому Богу воспеша:/ Господа пойте и превозносите Его во вся веки.

Богородичен: Рождшую Царя Небеснаго,/ являшагося в мир взыскати нас, погибающих,/ Тя, Богородице, величаем.

Песнь 9

Ирмос: Воистинну Богородицу/ Тя исповедуем,/ спасеннии Тобою, Дево Чистая,/ с безплотными лики Тя величающе. О, чудо велие, кости сухия источают исцеления/ и тленное естество дух наш к Нетленному Богу возводит./ Сего ради Матрону блаженную величаем.

Град Москву и обитель Покрова Пресвятыя Богородицы,/ идеже почивают честныя мощи твоя, праведная Матроно,/ сохрани от всяких напастей и зол / и утверди в правой вере и благочестии всех, почитающих тя.

Приими наше недостойное моление, Матроно блаженная,/ и, яко же обещалася еси, ходатайствуй пред Господем полезная нам даровати,/ да с тобою сподобимся в селениих райских славити Святую Троицу.

Богородичен: Истинную избранницу Твою, Богомати, вемы, Матрону блаженную:/ сия бо в день почитания иконы Твоея Скоропослушницы родися,/ в храме Успения Твоего крестися,/ образ Твой Взыскание погибших тщанием ея написася,/ таже и телом во обители честнаго Покрова Твоего почивает и молится о душах наших.

Светилен:

Ангели пресветлии вознесоша святую душу твою, блаженная Матроно, к Престолу Царя славы,/ идеже торжествуеши со всеми святыми и молишися о душах наших.

Слава, и ныне, Богородичен:

Свет истинный рождшая, Богородице,/ помраченных нас тьмою греховною просвети / и причастниками вечных благ соделай.

На хвалитех стихиры на 4, глас 8.

Подобен: О, преславнаго чудесе:

Приидите, вернии,/ старицу блаженную Матрону вси согласно восхвалим,/ яже в житии своем/ попечение изрядное о людех показа,/ и ныне прибегающим к ней благодатная деяния являет,/ таже, в лице святых водворяющися,/ престолу Божию присно

предстоит / и молится о спасении душ наших.
Присно в Бога богатящися,/ благодати Божия исполнишися,/ многия люди недужныя телом/ здравы сотворила еси,/ таже противу сил вражиих,/ досаждающих душам человеческим,/ воительница дерзновенная/ воистинну показала еси,/ Матроно, старице богоблаженная.

Лишения, гонения/ и уничижения от безбожных,/ беды от сродник и ближних/ Христа ради претерпела еси. / Ему же, и жизнь свою вверивши,/ богоблаженная старице Матроно,/ о творящих тебе напасти/ дерзновенно молилася еси,/ да в разум истины приидут и спасутся.

Слава, глас и подобен тойже:

О, преславнаго чудесе!/ О, таинства неизреченнаго!/ Слепорожденная Матрона преславная/ духовныма очима волю Божию прозирающая/ тайная душ человеческих зрит/ и помощь изрядную коемуждо потребную подает./ Да кийждо, от нея благодеение приемший/ Триединого Бога усердно прославит/ и достойную хвалу Ему принесет.

И ныне, Богородичен:

О, преславнаго чудесе!/ Небесе и земли Царица,/ от святых сродников наших умоляемая,/ до ныне землю Русскую покрывает,/ и лика Своего изображениями милостивно обогащает/ о, Владычице Державная,/ не престани и на будущее время,/ во утверждении на Руси Православия/ милости и чудеса изливати до века. Аминь.

Славословие великое. Ектении и отпуст.

На Литургии

Блаженны от канона песни 3-я и 6-я. Прокимен, глас 3: Господь просвещение и Спаситель мой,/ кого убоюся. Стих: Господь Защититель живота моего, от кого утрашуся. Апостол к Галатам, зачало 208. Аллилуия, глас 6: Господь решит окованныя, Господь умудряет слепцы. Стих: Возведох очи мои в горы, отнюдуже придет помощь моя. Евангелие от Луки, зачало 33. Причастен: В память вечную будет праведник: